

Story Power

Umhlahlandlela wokusiza
abantwana bakwazi ukufunda
nokutlola emakhaya



valiba

Wamukelekile!

Isikolo akusiyo kwaphela indawo lapha kufundiswa bekufundwe khona! Lokho amalunga womndeni akwenzako emakhaya kanengi kunikela abantwana umleyo wokuthoma oqakathekileko wokufunda iimfundo.

Lokha nawukholelwa kobana abantwana bakho bazakuba bafundi nabatloli beencwadi abaphumeleleko, bese ubayasiza kilokho, bazozizwa bebazi bona lokho kumnqopho abangawufikelela. Lokha nawuzinikela isikhathi sokubacocela, ubafundele bewutlole nabo iindatjana, bafumana ilwazi lokobana ilwazi lokufunda nokutlola lingaphunyelelwa begodu lingaba lisizo.

Ingabe ufuna ukwazi bona ungabasiza bunjani abantwana bakho ukufunda nokutlola? Yeke lomhlahlandlela we-Story Power ungewakho! Ngaphakathi kwawo ungafumana iimphakamiso zokwabelana ngeencwajana neendatjana ukunye nabantwana bakho nokobana ungabakhuthaza bunjani kobana batlole. Uzokwazi godu ukufumana ilwazi lokwazi ukuzithomela sakho isiqhema sokufunda ekhaya!

Okungaphakathi?

- Ukwenza ukufunda nokutlola kube yingcenywe yekhaya lakho 3
- Ukwabelana ngeencwadi kunye neendatjana..... 4
- Yenza abantwana bakho bakwazi ukutlola 6
- Ukulawula isiqhema sokufunda 7

Ukufumana ilwazi elingezelelweko lokubuyelela usebenzise begodu/nanyana wabelane ngeensetjenziswa lezi, thintana neNal'ibali ku:

The Nal'ibali Trust

Suite 17-201, Building 17

Waverley Business Park, Wyecroft Road

Mowbray, 7700

Umtato: (021) 448 6000

I-imeyili: info@nalibali.org



Thabela ukuthatha ikhambo nabantwana bakho ekhambeni lokufunda nokutlola!

Isiqhema sakwaNal'ibali

TJHEJA: Umhlahlandlela lo ufumaneka ngamalimi alitjumi nanye weSewula Afrika. Fumana eminye imihlahlandlela erhelweni le-Story Power! Ngena ku-www.nalibali.org ukufumana irhelo lelo.



Ukwakhiwa kwemiqondo nokuphathwa kwephrojekthi: Project for the Study of Alternative Education in South Africa (PRAESA)

Ukutjhugulula: Elizabeth Masombuka

Ukuhlela nokuhlelisa: Nomsa Mtsweni

Umdwebi wabalingisi beNal'ibali: Rico

Umtlami: Magenta Media

Umgadangisi: Baseline Publishing Services

Ukwenza ukufunda nokutlola kube yingcenywe yekhaya lakho



Lokha nawufunda bewutlole nabantwana esikhathini esinengi ekhaya, ubafundisa kobana ukufunda bebatlole kuzizinto eziqathekileko, ezilisizo begodu ezithokozisako ezingathatjelwa. Lokhu kwenza ukufunda nokutlola kube yinto elula kibo.

Omunye nomunye ekhaya unendima ekumele ayidlale ekuthuthukiseni ukufunda nokutlola kwabantwana bakho. Nasi eminye imibono engenza bona ukufunda kube yinto ethatjelwako epilweni yomndeni ngamaltanga.

★ **Yenza ihlelo lokufunda.** Zibekela isikhathi njalo ngelanga sokufunda nokucoca iindatjana. Abantwana abanengi bayakuthanda ukulalela iindatjana ngesikhathi sokuyokulala kodwana abanye bangakufumana kulula ukulalela ngokuthula ngezinye iinkhathi zelanga. Khetha isikhathi esifaneleko esingaba ngesinilungele kuhle noke.

★ **Ukucoca iindatjana.** Cocela abantwana bakho iindatjana, uvume iingoma bewurhayeneemilozelo neenkondlo ozaziko. Lokhu kuyinto elulukeza imikhumbulo yabo beyithuthukise ukuzicabangela nokuzenzela iinthombengcondo. Lalela zabo iindatjana nawe, abakucocela zona bese ukhumbule ukutjengisa ukuzithabela.



★ **Yabelana ngeencwadi.** Sebenzisa imizuzu eli-15 ngelanga ukufundela abantwana bakho iincwadi zeendatjana ufundela phezulu. Yenza kube sikhathi sokuthula, sokuthaba nokuzigedla. Lokha abantwana bakho babona kobana iindatjana ziyafumaneka eencwadini nokobana iincwadi zigcwele ubumnandi obucabangisako obunethabo, bazokulinga ukuzifundela ngokwabo. Abantwana ababafundi abahle nabakhutheleko beencwadi esikolweni, kanengi kubangilabo abafunda emakhaya kunye namalunga womndeni nabangani babo.

★ **Iba sibonelo kabanye.** Abantwana bafunda kuhle lokha nababukela esikwenzako kunokulalela lokho esibatjela bona bakwenze! Yenza bona abantwana bakho bakubone ufunda iincwadi uzifundela ubumnandi kunye nokufumana ilwazi, isibonelo, ukufunda iincwadi, amano neendlela zokupheka, imilayezo nezaziso ezivela esikolweni, abomagazini kunye namaphephandaba. Qinisekisa bona bakubona utlola epilweni yakho ngamalanga, isibonelo, ukutlola irhelo lezinto oyoziithenga, ukuthumela i-imeyili nanyana ugadangisa isaziso somhlangano kumalangenani wakho. Lokha abantwana basibona sifunda nanyana sitlola esikhathini esinengi, bayabona bona kuqathekile begodu kuyindlela enamandla, bese bathome ukukhlanganisa nepilo yabo nabo.

★ **Sebenzisa ilimi lekhaya (lokubelethwa).** Iindatjana zokuthoma kumele zibe ngelimi lomntwana lokubelethwa namkha elikhulunywa ekhaya. Abantwana kumele bafunde bebatlole ngelimi lokubelethwa nanyana lekhaya ngaphambi kobana bafunde ukufunda nokutlola ngamanye amalimi. Isisekelo esiqinileko ngamalimi wekhaya kusiqinisekiso esiqathekileko sokuphumelela ekufundeni – ukufaka hlangana ukufunda nokutlola – ngombana bafunda kuhle, kumele bazwisise kuhle.

Ukwabelana ngeencwadi kunye neendatjana

Yabelana ngeencwadi kunye nabantwana bakho ukubasiza ukuzakhela indlela edzimeleleko yokubanethando lazo ukube ngakelinye ihlangothi ubathuthukise ukwazi amakghono wokufunda okuyinto eqakathekileko epilweni ukwenzela bakwazi ukuphumelela esikolweni nokuya phambili nepilo.



Ukufundela abantwana bakho

Ukufunda kuvula amehlo wabantwana bakho, iinhliziyi kunye neengqondo zabantwana bakho, ukuphilisana nabanye abantu kunye nokuphila eendaweni nebumjani obuhlukahlukileko. Kokhunye, lokha bazwelela ubumnandi beendatjana owabelana nabo ngazo, kunokukghonakala bona baragele phambili ukuzifundela, bafundela ubumnandi epilweni yabo yoke ukuya phambili.

Naka amaphuzu alitjumi wokulemukisa angasetjenziswa ukufundela abantwana, kungakhathaleki bona baneminyaka emingaki nanyana badla kanganani.

1. Mema – nokho ungabakateleli – abantwana bakho bona nifunde nabo okungasenani imizuzu eli-15 ilanga elinye nelinye.
2. Thola indawo ethulileko nalapha kuyindawo bazazizwa bakhululekile ukufunda. Ukubasembhedeni nanyana bahlale eentulweni ezimasofa kuba ziindawo ezinofozelako zokufundela khona nabangendlini. Cima umrhatjho, umabonwakude kunye nomtjhiningqondo lapha bafundela ngakhona.
3. Bawa abantwana bona bazikhethele incwadi ebafuna bona bayifunde nawe. Lokho kubonisa bona uyakutjheja ukucabanga kwabo begodu kuba nobulula bokobana bangabelana bathande incwadi ebazikhethele yona ngokwabo!
4. Thoma ngokuthatha isikhathi uqale bewukhulume ngesembeso sencwadi (ikhavara yencwadi). Ungalibali ukufunda isihloko sencwadi kunye nebizo lomtloli kunye nebizo lomdwebi wabalingiswa.
5. Hlala nabo nitjhidelane, ukhuthaze abantwana bakho bona bazibambe incwadi nanyana bakusize ukuyibamba. Abantwana abancani bayakuthanda ukuphenya amaphepha. Bawa abantwana abakhudlwana bona bafunde amabizo wabalingisi nanyana indima yinye nanyana zimbili endabeni.
6. Linga ukusebenzisa iindlela ezimbalwa zokwenza bona indaba ibe mnandi begodu ibe ngephilako! Sebenzisa amezwi ahlukahlukileko wabalingisi abahlukileko. Fundela phasi ufunde buthaka iindima ezikhuluma ngendawo ethulileko. Funda burhaba lokha umlingisi kungorhabileko nanyana kungogijinyiswako. Funda ngelizwi elikhulu neliphezulu elimabhombo lokha kunetjhada elenzekako endatjaneni.
7. Siza abantwana bakho ukuba namakghono wokuzicabangela nokuzenzela isithombengqondo ngokubabuza imibuzo efana nokuthi, "Ucabanga bona kuzokwenzekani okulandelako?" eendinyaneni ezahlukileko zendaba.
8. Khulumisanani ngendaba ninoke. Khuthaza abantwana bakho ukubeka yabo imibono ngendlela babona abalingisi abaziphatha ngayo endabeni kunye neenqunto abazithathako.
9. Lokha incwadi ineenthombe, zicaliseni kanyekanye. Tshwaya ngezinto ozibonako nofuna ukwazi ngazo nobona zimimehlukwana nozithandako. Khuthaza abantwana bakho ukwenza lokho nabo.
10. Kunakho koke, thabela ukwabelana ukufunda iincwajana ezahlukeneko ndawonye. Hlalani nenze koke eningakwenza bona lesi isikhathi sibe sikhathi sethabo nokufunda kudlalwa kini noke.

Eminye imibono yeendaba

Nasi eminye imibono neendlela zokusebenzisa iindatjana ekhaya.

Yenza kube nesikhathi esikhethekileko sokufunda iindatjana

Yenza kube nesikhathi sokwabelana ngeendatjana ezizokuthatjelwa malunga womndeni ndawonye. Isibonelo, "Yibani nesikhathi seendatjana ngesikhathi sokudla kwantambama"! Kanye ngeveke, nikela ilunga elinye nelinye elihlukileko lomndeni ithuba linicocele indatjana ngesikhathi sokudla kwantambama. Indatjana leyo kungaba ngileyo ekhe bayifunda nanyana ebayicocelweko namkha indatjana etja abazakhele yona. Ningazakhela iindatjana kunye nabo ngokunikela ilunga linye lomndeni licoce ngesingeniso sendatjana bese kuthi elinye nelinye lingezelele indatjana ngamaphuzu bekufikele lapha woke anikele ngamaphuzu wokungezelela kufikele kube yindatjana epheleleko.

Buza imibuzo

Qinisekisa bona unikela abantwana ukuzwisisa ngokudephileko indatjana oyifundako ngokubabuza imibuzo evulekileko. Leli lihlobo lemibuzo engenapendulo okungiyo nanyana okungasiyo. Kumibuzo ethuthukisa ukuzicabangela kwabantwana ngeendatjana. Isibonelo, "Bewuzozizwa bunjani lokha...?", "Lokha nagade kunguwe, bewuzokwenzani?", "Ucabanga bona ukwenzeleni lokhu?", "Into eyenzekileko nanyana ayenzileko le ikukhumbuza ini?", "Wenzani lokha naku...?"

Nikela abantwana bakho ithuba lokubuza imibuzo! Baphendule nabo lokha nawukghonako nanyana ufune iimpendulo nabo ngokubuyelela nifunde benikhulumisane ngeendinyana ezifaneleko zendatjana.

Sebenzisa amathuba wokufunda iindatjana

Fumanela abantwana iindlela zokusebenzisa iindatjana obafundele zona nanyana obatjele zona. Isibonelo, bangabuyelela ukukucocela wena nabanye indatjana nanyana balingise iindinyana ezithileko zendatjana, dweba isithombe esithileko esingabalulukeza, nanyana utlole iledere linye lomlingisi osendatjeneni.



Buyelela iindatjana

Abantwana bayathanda ukuzwa iindatjana abazithandako nezibathabisako zibuyelelwe kanengana! Ngasosoke isikhathi lokha balalele nanyana bafunda indatjana abayithandako, bafumana bebefunde okutjha ngasosoke isikhathi. Bafunda iimfundo mayelana nelimi, namagama ngemiqondo emitjha kunye nokuthiywa nokubizwa kwezinto ezithileko.

Fumana iincwadi zokufunda

Iincwadi ziyabiza nawuzithengako, nje-ke lokha nawunebulungelo leencwadi eduze nalapha uhlala khona, livakatjhele ngasosoke isikhathi kunye nabantwana bakho. Bawa osebenza ebulungelweni ukukwazisa bekakulemukise ngeencwadi ezithabisako zelimu ofuna ukufundela ngalo abantwana nekulilimi abalizwisisa kuhle. Zinikele isikhathi esaneleko sokuphenya nokufunda hlanguana neencwadi ezikhona bese ukhulumisana nabantwana bakho ngalezo abazikhetheko ngaphambi kokuthatha isiqunto ngeencwadi ozoziboleka.

Yakha ukuzithemba ebantwaneni

Yamukela uthande ukulinga kwabantwana bakho ukuzifundela, njengalokha wathabela ukwazi kwabo ukubiza igama lokuthoma! Banikele isekelo elinengana bakwazi ukuthuthuka nokuzithemba – lokho kuba kukulwa okuyingcenywe yokufunda ukuzifundela. Balalele begodu kwakwazela okungabancani lokha benza kwangathi bayafunda – abantwana bamele baziphathe njengabantu abafundako ukuze babe bathandi bokufunda!

Bewazi-nje bona abantwana abafundako isikhathi esinengi esikhundleni sokubukela umabonwakude, bayakwazi ukulalela isikhathi eside?



Yenza abantwana bakho bakwazi ukutlola



Abantu basebenzisa ukutlola ngeendlela ezinengi ukwenza bona izinto zenzeke begodu bakghona ukuthintana bakhulumisane nabanye abantu. Kunjengobukghwari obahlukahlukeneko – lokha nawububuyelela ubenze, uba nokuthuthuka ukuba nelemuko lokubenza begodu wenze ngcono kunekuthomeni, godu ufumana iindlela ezingcono zokwenza! Njengababelethi kunye nabatlhogomeli babantwana senza bona sibe ziimbonelo ezihle ebantwaneni bethu lokha nasabelana ngamandla kunye neminqopho yokutlola ngawo woke amalanga epilweni yethu kunye nabantwana bethu. Nanzi ezinye iindlela ongenza ngazo lokhu.

- ★ Qinisekisa bona kunabantu abakusekela ngokukulethela amaphepha, iimpensela zemibalabala, amabholpheni kunye neempensela zokutlola ekhaya. Izinto lezi zibeke endaweni lapha abantwana bazokwazi ukuzifikela ngokwabo ukwenzela bona bazokwazi ukudweba nokutlola lokha bakhanuka ukwenza lokho.
- ★ Ukudweba kuligadango lokuthoma abantwana abalenzako ukuyokufikelela ukutlola. Tjengisa ukuba nekareko lemidwebo yabo ngokubakhuthaza bewubabuze imibuzo ngeenthombe zabo, isibonelo, "Indlu ebangayithabela ukuhlala ngakiyo. Ngubani ohlala ngendlini leyo?"



- ★ Nikela abantwana bakho ithuba abazolisebenzisa ukutlola ukuhlela iimpilo zabo. Isibonelo, banikele ithuba lokutlola irhelo lezinto ebayozithenga esitlolo, irhelo lezinto okumele bakhambe nazo esikolweni ngelanga elilandelako nanyana irhelo leemvakatji abazokuba nazo ngelanga labo lamabeletho. Ungazitshwenyi ngokutjheja khulu ukupela kwabo amagama ngendlela okungasingiyo. Lokho kuzokwenzeka kule ngokukhamba kwesikhathi lokha nabahlala bazifundisa ukutlola esikhathini esinengi. Lokha ungakwazi ukufunda okhunye erhelweni lezinto abazitlileko, babuze bona yini lokhu abakutlileko.
- ★ Tholela abantwana bakho amathuba wokuthintana nabanye ngokusebenzisa ukutlola. Abatlole: amabizo wabo emakaradeni wokutjhisana, amakarada wokuthokoza, batlole imilayezo eya emindenini ekhaya bebatlole ama-imeyili nanyana iincwadi eziya ebanganini nanyana amalunga womndeni ahlala kude nabo.
- ★ Khuthaza abantwana bakho ukuba namajenali lapha batlola khona ngezinto abazithandako: ukuzizwa bathabile kwabo, izinto ezenzeka epilweni yabo ekhaya kunye nesikolweni, nanyana/ namkha izinto abafuna ukuzikhumbula. Hlonipha umsithela wabantwana bakho begodu ufunde amajenali wabo ngemvumo yabo kwaphela.
- ★ Yenza iincwajana ngokuqobotjhela amaphepha ndawonye bese nitlola iindatjana wena nabantwana bakho. Abantwana abancazana bangadweba iinthombe. Zinikele bona kube nguwe otlola amagama ngalokho abakutjela khona kodwana bakhuthaze nabo ukulinga ukuzitlola ngokwabo. Vumela abantwana abakhudlwana ukudweba nokutlola ngokwabo. Fundela amalunga womndeni enihlala nawo iincwajana zabo abazitlileko kunye nabanye abanivakatjhelako!

Ukulawula isiqhema sokufunda



Ungazithomela isiqhenyana esincani sokufunda ekhaya kunye nabantwana bakho nabanye abangani babo okubantwana babomakhelwana. (Abantwana bangaba neminyaka nanyana ngengangani – kusuka kabancazana ukufikela ematlawaneni namajana.)

Iinqhenyana ezincani zokufunda zinikela wena nabantwana amathuba amanengi amahle wokuzitholela iindatjana kunye neencwadi. Okumele ukwenze kuthanda iindatjana bewufune ukwabelana ngazo nabantwana – kunye nomuntu munye omdala nanyana babili abakwazi ukufunda, abantwana bona bangaba bahlanu nanyana ababunane! Ngezelela ngesikhwama seencwadi kunye nezinye iintlabagelo zokutlola (ezifana neempensela zemibalabala, iimpensela zokutlola, amabholpeni namaphepha) ngalokho uzabe usele usendleleni yokuthoma isiqhema!

Ngesiqhema esincani, kubalula ukwazi abantwana boke kuhle. Yabelana nabo ngeencwadi ozithandako bese ufumanisa bona umntwana uthanda incwadi enjani yendatjana. Sebenzisa isikhathi ukufunda ukukhulumisana nabo ngeendatjana.

Wazi bunjani kobana ngiziphi iincwadi okumele uzikhethe? Vakatijhela ibulungelo leencwadi ehlangothini leencwadi zabantwana kanengana uyokufunisisa ngeencwadi ezikhona. Yazi abasebenzi bebulungelweni leencwadi zabantwana ukufumana iinlemukiso ngeencwadi abantwana abazithandako. Boleka yinye yeencwadi wena ozithandako, zifundise ukuyifunda bese uyifundela phezulu kunye namalunga wesiqhema. Lokha sele wazi abantwana bakho kuhle esiqhemeni, uzozifumana sele ufuna iindatjana ezingeneleleko neziletha ilulukezo kunye nekareko! Ungakhetha godu iindatjana eencwadini zebuthlelo labantwana kileli elithi “Story and rhyme library” kunye nelithi “Story supplies” okumahlangothi webuthlelo lakwaNal’ibali kuwebhusayidi yabo ethi-www.nalibali.org.

Kwenzekani ngokutlola? Linga ukwenza isikhathi sokutlola ngasosoke isikhathi lokha isiqhema sakho sokufunda nasihlanganako. Abantwana bayakuthanda ukutlola kibomalangeni (iindaba zangamalanga) begodu kuyinto ekulu ebasiza



ukukhula ekutloleni kwabo ngamalimi wekhaya nanyana/namkha ngamalimi wokungezelela. Khuthaza abantwana ukutlola (kunye nokudweba) kibomalangeni babo ngenye nenye into – abayicabangako, ngemizwa yabo, imicabango yabo nanyana lokho abathanda ukukwenza ngelanga lelo. (Qinisekisa bona bayazi bona lokho abatlola ngakho kuyinto yabo eyifihlo ngaphandle kobana bakhethe bona bayabelane nabanye.) Kuyinto ehle ukungalingisi ukupeleda kwabo amagama – ngombana kungilokho abakutjhoko okuqakathekileko. Nokho ungabakhuthaza ngokutlola kwakho kumalangenise bese wabelana nabo imicabango yakho, indlela ehlwengekileko necacileko otlole ngayo kunye nokupeledwa kwamagama ngendlela efaneleko usebenza kunye nabo.

Okhunye nokhunye okhetha ukukwenza nesiqhema sakho sokufunda, khuthaza abantwana ukuzibandakanya – kodwana ungabakateleli. Umnqopho kukobana uthokoze bewuthabe lokha nawufumana nanyana wabelana iindatjana nabo.

Ukufumana okunengi ngokuthoma isiqhema sokufunda, vakatijhela ihlelo lethu elithi “How to guides” ku-www.nalibali.org nanyana elithi “How to” ku-www.nalibali.mobi.

Ungafumana godu ilwazi elingeneleleko ku-*Story Power: Umhlahlandlela weenqhema zokufunda ndawonye ofumaneka* ku-“Story supplies” ku-www.nalibali.org.

Zihlanganise neNal'ibali

Yiba yingcnyye yethungelelwano leNal'ibali bese usebenzisa amandla weendaba ukukhuthaza abantwana bafune ukufunda nokutlola.

Vakatjhela imithombo eyahlukileko yeensetjenziswa neenyeleliso zokufundela ukuzithabisa, neendaba zabantwana ngamalimi ali-11.

Iingezelelo zeNal'ibali

Thola isingezelelo sephephandaba sakho sokufundela ukuzithabisa esimalimimabili ku-Sowetan, Sunday Times Express, Daily Dispatch naku-The Herald. Ukufumana ilwazi elingezelelweko, vakatjhela ku-www.nalibali.org.



UNal'ibali emrhatjweni

Lalela amahlelo weNal'ibali eentetjhini zomphakathi ze-SABC uzithabise ngeendaba zabantwana ngawo woke amalimi ali-11 asemthethweni eSewula Afrika. Vakatjhela ku-www.nalibali.org ukuthola **itjhejuli yamalanga neenkathi yomrhatjho** yeNal'ibali.

www.nalibali.org

Vakatjhela **kuwebhusayidi** yeNal'ibali ukuthola imitlolo yasimahla yeenyeleliso, ibhlogo lokufunda ukufunda nokutlola, iinyeleliso zokufunda neendaba zabantwana.

www.nalibali.mobi

Thola iinyeleliso zokucoca indaba nokufunda, iinqhema ezisekelanako zokufunda neendaba ngamalimi woke weSewula Afrika ali-11 – ku**funjathwako** wakho!



Amacoco thungelelwano

Hlanganyela ikulumiswano ku**Facebook** begodu usilandele ku**Twitter** naku**Instagram** ukuthola iinyeleliso neendaba ezitjha zokufundela ukuzithabisa. Ungavakatjhela nehlelo lethu le-**YouTube**, www.youtube.com/user/TheNalibaliChannel ukuthola iinyeleliso ezilisizo zesiqhema sokufunda ndawonye.



Ungasithinta ngokusibethela umtato ezikweni lethu enomborweni ethi **02 11 80 40 80**, nanyana

ngenyne nenyne yeendlela ezilandelako:  www.nalibali.org  www.nalibali.mobi

 nalibaliSA  @nalibaliSA  @nalibaliSA  info@nalibali.org

